

էին պարտից կառավարութեան եւ իրենց պետութիւնների անունից ուղղակի պահանջում, որ ստիպեն հայերին կաթողիկ դառնալու: Նրանք պնդում էին, որ Պապի իշխանութիւնը չընդունող քրիստոնեաների ներկայութիւնը Պարսկաստանում վիրաւորական է իրենց եւ իրենց պետութիւնների համար:

Ահա առիթը՝ նոր հալածանքների, նոր խստութիւնների, նոր բռնութիւնների ընդդէմ հայ ժողովրդի:

Չնայած այդ ամենին, կաթողիկ միսիոնարները շատ քիչ յաջողութիւն ունէին իրենց գործունէութեան մէջ: Ճիշդ է, նրանց յաջողւում էր յուզմունք առաջացնել, աղմուկ եւ պատակտում ձգել մեր կեանքում. յաջողւում էր կառավարական նորանոր ճնշումներ հանել տալ հայութեան դէմ, բայց պոկել լուսաւորչական հայերին զանգուածորէն իրենց եկեղեցու գրկից եւ կաթողիկացնել — այդ նրանց չէր յաջողւում: Ապացոյց, որ նրանց գործունէութեան կենտրոններում — Երեւան, Նախիջևան, Պահուկ, Գողթան — այսօր մի հատ էլ հայ կաթողիկ չկայ: Նրանք իրենք էլ գզում էին իրենց անդորութիւնը եւ իրենց անյաջողութիւնը վերադրում էին սատանային: «Սատանան, որ միշտ թշնամի է հաւատի յառաջադիմութեան, իր բոլոր ջանքերը գործադրում է աւերելու մեր այնքան յոյսերը» — գրում էր Հայաստանում գործող քարոզիչներից մին իր գեղուցման մէջ (Եղեան, «Պետրոս Մեծի յարաբերութ. 15):

Այս երեւոյթը — հայերի անդրդուելիութիւնը իրենց կրօնի մէջ — զարմանք էր պատճառում այն ժամանակներում Հայաստան այցելող բոլոր եւրոպացի ճանապարհորդներին: Օրինակ, Շարդէնը այդ մասին գրում է «Ռէպի Պարսկաստան եւ Արեւելը» աշխատութեան մէջ. «Մի զարմանալի եւ եթէ կ'ուզէք՝ մի հըրաշք բան է, որ հայերը, լինելով 11 դար մահմեդական լծի տակ, լինելով աղքատ եւ տգէտ, ինչպիսին կարող են լինել այդպիսի ստրկութեան մէջ դանուող ժողովուրդները. բայց չնայած դրան, նրանց հաւատը անդրդուելի է: Նրանք հաւատարիմ են իրենց կրօնին, առանց կամենալու սրբեզրել մէկ ուրիշը. ուստի հաւասարապէս դիմադրում են եւ իրենց մահմե-

դական տէրերի հալածանքներին, եւ հռովմէական եկեղեցու միսիոնարներին: Հռովմէական եկեղեցին, աւելի քան 2 դարից ի վեր, իր քարոզիչները միջոցով աշխատում է նրանց բերել իր դաւանութեանը: Դժուար է թուել այն հնարներն ու ծախսերը, որ Հռովմը գործադրեց այդ նպատակի համար — սակայն ապարդիւն» (Եղեան, նոյն տեղ, 18):

Հայոց դժբախտ կաթողիկոսներն էլ շարունակ մտահոգուած էին, թէ ինչպէս կարողանան պաշտպանել իրենց հօտը այդ վայրի գազաններից: Միջոցներից մէկն էր՝ դիմումներ անել Պապերին եւ նկարագրելով երկրի ծանր դրութիւնը, քարոզիչների կատարած վատ գործերը, խնդրել, որ նրանք՝ Պապերը՝ զսպեն միսիոնարներին, ենթադրելով միամբտորէն, թէ այդ ամէնը նրանք անում են առանց Պապերի գիտութեան: Բնական է, որ այդ նամակների մէջ կաթողիկոսները չպիտի մոռանային յարգանքի սովորական արտայայտութիւնները Պապերին եւ պիտի խօսէին քրիստոնէական միութեան ու եղբայրութեան անունից:

Դժբախտաբար, այս հանգամանքն էլ կաթողիկ հողեւորականութիւնը դարձնում էր իր ձեռքում մի դէնք՝ հայոց եկեղեցու դէմ պայքարելու համար: Կաթողիկ պատմագիրները — որոնց թւում նաեւ Հ. Մ. Չամչեան — այդ գիմումները միշտ նկատել են հպատակութեան փորձ հայոց եկեղեցու պետերի կողմից Հռովմի աթոռին:

Նման երկու նամակ էլ գրել է Ալէքսանդր Ջուղայեցի կաթողիկոսը, որոնցից մէկը — գրուած 1709 թ. — յիշում է Չամչեանը եւ քաղուածքներ բերում նրանից իր Հայոց Պատմութեան մէջ (Գ. եր. 749), իսկ միւսը, որ գրուած է 1711 թ. ապր. 16-ին, տպուած է «Փարոս» ամսագրում (1873 թ. տետր. Բ.), որի մանրամասն բովանդակութիւնը բերում է Կ. Եղեանը իր՝ «Պետրոս Մեծի յարաբերութիւնը հայ ժողովրդի հետ» երկասիրութեան մէջ:

Ըստ Չամչեանի՝ այդ նամակը (1709-ին գրուած) «գիր սիրոյ եւ յարգութեան» է եւ ընդհանուր տպաւորութիւնն այնպէս է, որ Ալէքսանդր կաթողիկոսը իր հպատակութիւնը